

# Quant paja in cusseglier naziunal per ses cumbat?

Retschertga tar quatter parlamentaris federalis

DA CLAUDIA CADRUVI / ANR

■ **Tranter 7000 e 50 000 francs han ils cussegliers naziunals dal Grischun pajà ord l'atgna bursa per il cumbat electoral il 2007 – almain quels che dattan scleriment. Tazisius Caviezel na vul betg tradir ses budget.** En tut haja el dà ora radund 50 000 francs per l'ultim cumbat electoral, di *Sep Cathomas* (pcd). Da quai haja el pajà a sia partida var 20 000 francs. I saja usit tar la pcd che il candidat elegì paja 15 000 enfin 20 000 francs. Il candidat sin il segund plaz dettia 5000 enfin 10 000 francs ed ils trais auters candidats pajan 500 enfin 2000 francs. La partida pretendia questas summas perquai che mintga candidat sin la glista profiteschia da la reclama ch'ins fetschia per tuts.

## «In chatscha l'auter»

La gronda part dals daners haja el pajà ord l'atgna bursa, di *Cathomas*. I dettia bain qua u là in'organisaziun u uniuon che haja contribuì ina pitschna summa, ma quai na fetschia betg ora bler. «Jau n'hai era betg vuli blers daners, pertge uschiglio èn ins lià.» En las tractativas en il parlament sentian ins savens, tge politichers che sajan liads sin tala moda cun cassas da mal-sauns, bancas u l'industria.

Per gudagnar raps na stoppian ins betg ir en la politica, di *Cathomas*. «Pertge cun star a chasa e lavurar gudognian ins tuttina bler.» En il proxim cumbat electoral vegnian ils candidats probabel anc ad investir dapli. Cun trais sezs libers en il cussegl naziunal creschian las schanzas da gudagnar. Sche in candidat fetschia in inserat, stoppia l'auter era inserar per che las schanzas restian intactas. «Quai fan ins automaticamain», di *Cathomas*. «Il davos



han ins dà ora tants daners ch'ins n'avess mai pensà d'investar tant.» *Cathomas* fa plinavant attent ch'el n'haja betg lavurà cun glied da PR professiunala. Sch'ins engaschia tala glied per in cumbat electoral custia tut anc bler dapli.

## Enfin 100 000 francs a Turitg

Var 15 000 francs haja el pajà a sia partida per il cumbat electoral ed ils agens custs hajan muntà a circa 10 000 francs, di *Hansjörg Hassler* (pbd). Sia partida fetschia quai pli u main tuttina sco las autras partidas grischunas: Il cumbat electoral vegnia finanzià entras contribuziuns dals commembers ed entras sponsurs che dattan daners per il cumbat.

Las dimensiuns finanzialas sajan anc

moderatas en il Grischun. En chantuns sco Turitg na saja in budget persunal da 100 000 francs nagina excepziun pli. A Turitg cumbattian ins per 34 sezs. I dettia tants candidats che la situaziun daventia nunsurvesaivla. In candidat stoppia perquai investir bler per daventar enconuscent.

Il Grischun haja d'occupar mo tschintg sezs en il cussegl naziunal e la glied enconuschia ils politichers. Per il cumbat electoral da quest onn na quinta *Hassler* betg cun dapli custs ch'enfin uss e spera che la glied vesia tge lavur che saja vegnida fatga en il parlament.

## In cusseglier naziunal «bunmartgà»

«Mes cumbats electorals èn stads extrem

bunmartgads», di *Andrea Hämmerle* (ps). Dals 200 cussegliers naziunals saja el en quest grà in dals pli bunmartgads. «I n'exista gnanca in sulet flyer mo da mai. Jau n'hai mai manà in cumbat electoral mo per mamez.»

Sco enconuscent cusseglier naziunal en uffizi saja quai oz anc adina pussaivel da manar in cumbat electoral cun paucs daners. Ma tendenzialmain daventian ils cumbats pli chars e pli individualistics. «Mintgin guarda mo pli per sai», di *Hämmerle*. Questa tendenza na saja betg buna, ma ella na sa laschia betg pli retegnair. El n'haja mai investà daners per agens inserats u placats e tge summa ch'el haja stuì dar a sia partida per il cumbat na sa regordia el era betg pli.

Sin il secretariat da la ps hai num ch'i sa tractia da var 7000 francs ch'il candidat elegì haja pajà sez. Il 2007 hajan ins gi in budget da var 80 000 francs per il cumbat electoral cun duas glistas e per il candidat per il cussegl dals chantuns. Circa la mesadad haja la partida finanzià, ina quarta hajan ils indesch candidats pajà ed il rest sajan donaziuns. «Mintgin duai pudair candidar», di il president da la ps *Jon Pult*. «Ina candidatura na dastga betg esser dependenta da la situaziun economica d'ina persuna.» Quai saja in principi da basa da la ps.

## «Nagin commentari»

E quants daners ha *Tazisius Caviezel* investà? Ses cumbat electoral saja stà il pli char che saja vegnì manà inscuras en il Grischun, han ins pudì leger il 2007 suenter sia elecziun. «Nagin commentari», è la resposta dal cusseglier naziunal da la pld. El n'haja betg duvrà tants daners sco quai ch'ins haja adina raquintà. Intgins auters candidats hajan dà ora circa tuttina bler, ma el na veglia numnar naginas cifras.

Sch'ins n'haja avant betg fatg politica e cumenzia tar nulla, custia ina elecziun simplamain dapli che per in politicher enconuscent, di *Caviezel*. El haja per exempel era laschar far ina homepage en trais linguas, talas chaussas custian simplamain.

E tge budget stat a disposiziun per il cumbat electoral vegnent? I dependia, tge ch'ins fetschia e nua ch'ins pendia si placats, di *Caviezel*. El veglia quella giada far giu tut cun sia partida e cun il team per il cumbat electoral. I vegnia a custar pli pauc che la davosa giada. Ma i saja anc memia baud da savair dir dapli.

**Tgi che vul restar independent e conquistar in mandat sto per il solit prender daners ord l'atgna bursa per il cumbat electoral.**

KEYSTONE